

南北史合注

欽定四庫全書

南北史合注卷一百十五

明 李清 撰

列傳第十七

北史二十九

陸 侯

源

賀

曾孫彪
師從叔雄

玄孫師

劉 尼

薛 提

陸侯代人曾祖幹祖引世領部落父突道武初帥部人
從征伐數有戰功位離石鎮將上黨太守關內侯侯少

欽定四庫全書

南北史合注
卷一百十五

聰慧明元踐祚襲爵關內侯位給事中典選部蘭臺事
當官無所撓太武征赫連昌詔侯督軍鎮以備柔然與
西平公安頡攻尅虎牢賜爵建鄴公拜冀州刺史時考
州郡惟侯與河內太守邱悅為天下策一轉虎牢鎮大
將平涼休屠金崖羌狄子玉等叛復轉為安定鎮大將
追討崖等皆獲之遷懷荒鎮大將末期諸高車莫弗訖
懼侯嚴急請前鎮將即孤太武許之徵侯至京朝見言
不過周年孤身必敗高車必反帝疑不實切責之以公

歸第明年諸莫弗果殺孤叛帝聞大驚召侯問故侯曰
高車之俗上下無禮無禮之人難為其上臣蒞以威嚴
節之憲綱欲漸加訓導使知分限而惡直醜正實繁有
徒故訟臣無恩稱孤之美孤獲還鎮欣其名譽必譏臣
為失專以寬惠臨之仁恕待之無禮之人易生陵傲不
過期年無復上下既無上下然後收之以威則人懷怨
慙怨慙既多敗亂彰矣帝歎曰卿身雖短慮何長也即
日復除散騎常侍帝征柔然破涼州常隨駕別督輜重

又與高涼王那渡河南略地仍遷長安鎮大將與那擊破蓋吳於杏城獲吳二叔諸將欲送京侯獨不許曰若不斬吳恐長安之變未已一身藏竄非其親信誰能獲之若停十萬衆追一人非上策也不如私許吳叔免其妻子使自追吳諸將咸曰今獲其二叔惟吳一人何所復至侯曰

魏書載侯言曰吳逆背性生今若獲免必誑惑愚民稱王者不死為患滋大

諸君不見毒蛇乎不斷其頭猶能為害況除腹心之疾而曰必遺其類可乎

魏書曰諸將恐吾二叔不返將不免於罪侯曰此罪我為諸君當之

遂舍吳二叔與之期及期吳叔不至諸將咎侯侯曰此未得其便必不背也後數日果斬吳以至侯明略獨決皆此類也遷內都太官安定盧永劉超等叛帝念侯威恩被關中詔加都督秦雍諸軍事鎮長安命以方略定

超事入本紀侯遵諭單馬之鎮

魏書曰超等聞之大欣以為無能為也

既至申揚威信示以成敗誘納超女外若姻親超猶無降意侯乃率其帳下見超超使人逆曰三百人外當弓馬相待三百人內當酒食相供乃將二百騎詣超超備甚嚴遂縱酒盡醉而還

魏書曰侯乃謂將士曰超可取也密選精兵五百人激厲將士皆願以死從

後偽獵詣超與士卒約曰今會發機當以醉為限侯乃
詐醉上馬大呼斬超首士卒應聲縱擊遂平之帝大悅
微拜外都大官文成踐阼以子麗有定策勲進爵東平
王薨年六十七謚曰成有子十二人長子馥多智有父
風文成見而悅之謂朝臣曰吾常歎其父智過其軀是
復踰父矣少為內都下大夫奉上接下行止取與每能
逆曉人意與從事者無不愛之興安初賜爵聊城侯出
為相州刺史假長廣公為政清平抑強扶弱州中有德

宿老待以友禮詢之政事責以方略如此者十人號曰
十善又簡取諸縣強門百餘人以為假子誘接殷勤賜
以衣服令各歸家為耳目於是發奸摘伏事無不驗百
姓以為神明無敢劫盜者在州七年家至貧約徵為散
騎常侍而士民乞留馥者千餘人獻文不許謂羣臣曰
馥之善政雖古人何加賜絹五百疋奴婢十口馥之代
還也吏民大斂布帛以遺之馥皆不受民亦不取乃以
此物起佛寺名長廣公寺後襲父爵改封建安王時宋

司州刺史常珍奇以懸瓠內附新人猶懷去就馥銜旨
撫慰諸有陷軍為婢奴者馥皆免之百姓欣悅民情乃
定駕討柔然詔馥為選部尚書錄留臺事及獻文將禪
位於京兆王子推任城王雲龍西王源賀並固諫馥抗
言曰太子聖德承基四海瞻望不可橫議千國之紀臣
請勿頸殿庭有死無二久之帝乃解詔曰馥直臣也其
能保吾子乎遂以馥為太保與太尉源賀持節奉皇帝
璽紱傳位孝文延興四年薨贈以本官謚曰貞馥有六

子琇凱知名琇字伯琳馥第五子母赫連氏身長七尺九寸甚有婦德馥有以爵傳琇意琇年九歲馥謂曰汝祖東平王有十二子我以嫡長承業今已年老屬汝幼冲詎堪為陸氏宗首乎琇對曰苟非鬪力何患童幼馥奇之立琇為世子馥卒襲爵琇沉毅少言雅好讀書以功臣子孫累遷祠部尚書司州大中正坐從兄獻事免官景明初守河內郡咸陽王禧謀反令子曇和等先據河內琇聞禧敗斬曇和首時以琇不先送曇和禧敗始斬責其通

情徵詣廷尉少卿崔振窮罪狀案琇大逆陸宗大小咸
見收捕會將赦先斃於獄琇弟凱仍上書訴寃宣武詔
復琇爵凱字智君謹重好學位太子庶子給事黃門侍
郎凱在樞要十餘年以忠厚見稱後遇患頻上書乞骸
除正平太守在郡七年號為良吏初孝文將議革變舊
風大臣並有難色又每引劉方郭祚等與規謀共論政
事而國戚舊人謂遂疎已怏怏不平帝令凱私喻之曰
至遵但欲廣知前事問其古式耳終不寵彼而相疎也

衆乃稍解及兄琇陷罪凱亦被收遇赦免凱痛兄死哭
無時節目幾失明訢寃不已及復琇爵凱大喜置酒集
諸親曰吾數年抱病忍死者顧門戶計耳今願已遂矣以
其年卒贈龍驤將軍南青州刺史謚曰惠長子暉字道
暉與弟恭之並有時譽洛陽令賈禎見其兄弟歎曰僕
以老年更覩雙璧又嘗兄弟共侯黃門郎孫惠蔚謂諸
賓曰不意二陸復在坐隅暉位尚書右戶三公郎坐事
免除伏波將軍卒贈冠軍恒州刺史暉擬古急就篇為

悟蒙章及七琇十醉章表數十篇暉與恭之晚不睦為
時所鄙恭之字季順有操尚位荊州刺史贈吏部尚書
謚曰懿恭之所著文章詩賦凡千餘篇子畧篤志文學
作齊律序位終通直散騎常侍弟寬太子中舍人待詔
文林館寬兄弟並有才品議者稱為三武馥弟歸歸孫
旭性雅淡好易緯候之學撰五星要決兩儀真圖頗得
其指要太和中徵拜中書博士稍遷散騎常侍知天下
將亂隱于太行山屢徵不起卒後贈并汾恒肆四州刺

史子騰字顯聖慷慨有大節從爾朱榮平葛榮以功賜爵清河縣伯

周書曰騰尚東萊王貴平女安平公主孝武幸貴平第見騰與語悅之謂貴平曰阿翁真得好婿

稍遷通直散騎常侍及孝武西遷時使青州遂留鄴為陽城郡守大統九年大軍東討陽城

周書曰時兵威甚盛長史麻休勸騰降不許俱守月餘城乃陷

被執周文釋與語騰盛論東州人物又敘述時事辭理
抑揚周文嘆曰卿真不背本也即拜帳內大都督遷武
衛將軍騰既為周文所知思欲立功不願內職及安康
賊黃衆寶等作亂攻圍東梁州城中糧盡召騰率軍自
子午谷往援騰星言就道與戰大破之軍還拜龍州刺
史使通江由路直出南秦

周書載周文謂騰曰卿宜善思經略騰曰臨機制變
未敢預陳

周文謂曰此卿取柱國之日即解所服金帶賜之州人
李廣嗣李武等馮據巖險歷政不能制騰密令多造飛
梯身率麾下夜襲破之執廣嗣等于鼓下其黨有任公
忻圍逼州城請免廣嗣及武彼即散兵請罪騰謂將士
曰公忻豎子乃敢邀人吾不殺廣嗣等可謂墮軍實而
長寇讐即斬廣嗣及武示以首出兵奮擊盡獲之進位
驃騎將軍開府儀同三司進爵上庸縣公陵州木籠獠
恃險每行抄劫詔騰討之獠因山為城攻未可拔騰於

城下多設聲樂諸伎示無戰心諸賊果棄其兵仗或挈攜妻子臨城觀樂騰知其無備密令衆軍俱上諸賊不知所為縱兵討擊盡破之周明帝初陵眉等八州夷夏並反攻破郡縣騰率兵討平之及齊公憲作鎮於蜀以騰為隆州刺史令憲入蜀兵馬鎮防皆委騰統攝趙公招代憲復請留之遷隆州總管領刺史保定二年資州石盤人反殺郡守據險自守州軍不能制騰率軍討擊盡破斬之而蠻獠兵所在蠡起山路險阻難得掩襲遂

量山川形勢隨更開道蠻獠畏威承風請服所開之路
多得古銘諸葛亮桓溫舊道是年鐵山獠抄斷內江路
使驛不通騰進軍討之

周書曰騰欲至鐵山乃偽還師賊不以為虞騰乘其
無備出擊之應時奔潰

一日下三城招納降附者三萬戶帝以騰母在齊未令
東討適有騰親屬自齊還朝晉公護奏令告騰云齊已
誅公母兄蓋欲發其怒也騰發哀泣血志在復讐四年

齊公憲與晉公獲東征請騰為副趙公招時在蜀復欲留之晉公護與招書乃令騰馳傳還朝副憲東伐天和初信州蠻蠻據江破叛連結二千餘里又招騰討之騰沿江南而下軍至湯口分道奮擊所向崔破乃築京觀以旌武功涪陵郡守蘭休祖又阻兵為亂方二千餘里復詔騰討之

周書曰當時雖挫其鋒而賊衆既多自夏及秋師老糧盡騰乃激勵衆士復攻拔其魚令城大獲糧儲以

充軍實又破柵築二城以鎮遏之

巴蜀悉定詔樹碑紀績騰自在龍州至是前後破平諸賊凡賞得奴婢八百口馬牛稱是四年遷江陵總管陳遣其將章昭達圍江陵衛王直聞有寇遣大將軍趙閻李遷哲等率步騎赴之並受騰節度時遷哲等守外城陳將程文李雷道勤夜來掩襲遷哲等驚亂不能禦騰夜遣開門奮擊大破之陳人奔潰道勤中流矢斃陳人決龍州寧朔堤引水灌江陵城騰親率將士戰于西堤

破之陳人遁加位柱國進爵上庸郡公建德二年徵拜
大司空尋出為潭州總管宣政元年冬卒詔贈太尉公
謚曰定子玄嗣騰入關時玄年方七歲仕齊為奉朝請
成平令齊平武帝見玄特加勞勉即拜地官府都上士
大象末為隋文帝相府內兵參軍馥弟麗少以忠謹入
侍左右太武特昵之舉動審慎初無僭失賜爵章安子
稍遷南部尚書太武崩南安王余立既為中常侍宗愛
等所殺百寮憂惶莫知所立麗建大議與殿中尚書長

孫渴侯尚書源賀羽林中郎劉尼奉迎文武於苑中而立之社稷獲安麗之謀也由是受心膺之任在朝無出其右興安初封平原王麗頻讓

魏書載麗辭曰陛下以嫡統承基奉迎守順臣子之常豈敢昧冒以干大典

不聽乃啟以讓父

魏書載麗辭曰臣父歷奉先朝年至西夕未登王爵願裁過恩聽遂所請

文成曰朕為天下主豈不能得二王封卿父子也以其父侯為東平王麗尋遷侍中撫軍大將軍司徒公復其子孫賜妻妃號麗以優寵既頻固辭不受帝益重之領太子太傅麗好學愛士常以講習為業甚孝遭父憂毀瘠過禮和平六年文成崩先是麗療疾於代郡溫泉間凶欲赴左右止之曰宮車晏駕王德望素重姦臣若疾民譽慮有不測之禍願少遲回麗曰安有聞君父之喪方慮禍難者便馳赴初乙弗渾悖傲每為不法麗數諍

之由是見忌害之謚曰簡陪葬金陵孝文追錄先朝功臣以麗配饗廟庭麗二妻長曰杜氏次張氏長子定國杜氏所生次獻張氏所出定國在襁抱文成幸其第詔養宮內至于游止常與獻文同處年六歲為中庶子及獻文踐祚拜散騎常侍賜封東郡王定國以承父爵辭不許又以父爵讓弟敞乃聽之累遷司空定國恃恩不循法度延興五年坐事免為兵太和初復除侍中鎮南將軍秦益二州刺史復王爵八年卒于州贈以本官謚曰

莊子昕之風望端雅襲爵例降為公尚獻文女常山公主
拜駙馬都尉歷官有政績轉安北將軍相州刺史卒贈鎮東
將軍冀州刺史謚曰惠初定國娶河東柳氏生子安保後
娶范陽盧度世女生昕之二室俱舊族而嫡妾不分定國
亡兩子爭襲父爵僕射李冲有寵于時與度世子伯源婿
親相好遂左右助之昕之由是承襲尚主職位赫奕安保
沉廢不免飢寒昕之容貌柔謹孝文以其主壻特垂昵
眷宣武時年未四十頻撫三藩昕之卒後母盧過傷而

亡公主奉姑有孝稱神龜初與穆氏瑯邪長公主並為女侍中又性不妬以昕之無子為納妾媵而皆育女公主有三女無男以昕之從兄希道第四子彰為後子彰字明遠年十六出後事公主盡禮丞相高陽王雍常言曰常山妹雖無男以子彰為兒乃過自生采正光中襲爵東都公累遷給事黃門侍郎子彰妻即咸陽王禧女禧誅養於彭城王弟孝莊親之略同諸姊建義初爾朱榮欲循舊事庶姓皆封王由是封子彰濮陽郡王尋

詔罷仍復先爵天平中拜衛將軍潁州刺史以母憂解
任元象中以本將軍除齊州刺史又加驃騎將軍行懷
州事轉北豫州刺史仍除徐州刺史將軍並如故一年
歷三州當世榮之還朝除衛大將軍右光祿大夫行瀛
州事尋拜侍中復行滄州事進號驃騎大將軍行冀州
事除侍讀兼七兵尚書行青州事子彰初為州以聚歛
為事晚節修改自行青冀滄瀛甚有時譽加以虛已納
物人敬愛之除中書監卒贈開府儀同三司謚文宣子

彰崇好道術曾嬰重病藥中須桑螵蛸子彰不忍害物
遂不服其仁如此教訓六子印印字雲駒少機悟美風
神好學不倦博覽羣書五經多通大義善屬文甚為河
間邢邵所賞邵又與子彰交游嘗謂子彰曰吾以卿老
蚌出明珠意欲為羣拜紀可乎由是名譽日高雅為搢
紳所推起家員外散騎侍郎歷中書舍人兼中書侍郎
以本職兼太子洗馬自梁魏通和歲月交聘印每兼官
讌接在席賦詩印必先成雖未盡工以敏速見美除中

書侍郎修國史以父憂去職居喪盡禮哀毀骨立詔以
本官起文襄時鎮鄴嘉其至行親詣門慰勉之卬母魏
上庸公主初封藍田高明婦人也甚有志操卬昆季六
人並主出故邢邵常謂人云藍田生玉固不虛矣主教
訓諸子皆以義方雖創巨痛深出于天性然動依禮度
亦母氏之訓焉卬兄弟相率廬墓側負土成墳朝廷嗟
尚發詔褒楊改其所居里為孝終里服竟當襲不忍嗣
侯使迄未應受齊天保初常山王薦卬罷幹文宣面授

給事黃門侍郎遷吏部郎中上洛王思宗為清都尹辟
為邑中正食貝邱縣幹遭母喪哀慕毀悴殆不勝喪遂
至沈篤頓伏牀枕又成風疾第五弟搏遇疾臨終謂其
兄弟曰大兄疴病性至慈愛搏死日必不得使大兄知
之哭泣聲必不可聞徹致有感動家人至於祖載方告
之叩聞而悲痛一慟便絕年四十八叩自在朝篤慎周
密不揚人短不伐已長言論清遠有人倫鑒裁朝野甚
悲惜之贈衛軍青州刺史謚曰文所著文章十四卷行

于世齊之郊廟諸歌多印所制子又字旦襲爵始平侯
又聰敏博學有文才年十九司州秀才歷通散騎侍郎
待詔文林館兼散騎侍郎迎陳使還加通直散騎常侍
又于五經最精熟館中謂之石經人爲之語曰五經無
對有陸又印第五弟駿自中書舍人歷黃門侍郎卒於
東廣州刺史駿弟杳字雲邁亦歷中書舍人黃門常侍
秦州刺史武平中爲寇所圍經百餘日就加開府儀同
三司城中多疫癘死者過半人無異心遇疾卒及城陷

陳將吳明徹以杳有善政吏民所懷啟陳主還其屍家累貨物無所犯贈開府儀同三司尚書僕射杳弟騫字雲儀亦歷中書舍人黃門常侍武平末吏部郎中騫弟彥師字雲房少以行檢稱及長好學解屬文魏襄城王元旭引為參軍事以父喪去職哀毀不勝喪與兄卬廬於墓次鄉人重之皆就墓側存問晦朔之際車馬不絕中書令河間邢邵表薦之未報後歷中外府東閣祭酒兄卬當襲父始平侯以彥師昆弟中最幼表請讓封彥

師固辭而止世稱友悌孝義總萃一門為中書舍人通直散騎侍郎每陳使止必高選主客彥師所接對者前後六輩歷中書黃門侍郎後以不阿宦者遇讒出為中山太守有惠政數年徵入累官給事黃門侍郎武平末駕如晉陽北平王貞鎮鄴彥師掌留臺機密以重慎見知周武帝平齊授下大夫轉少納言賜爵臨水縣男及隋文為丞相彥師遇疾請假還鄴尉遲迴將起兵彥師知之將妻子潛歸長安文帝嘉之及受禪累遷尚書左

丞進爵為子彥師素多病乞解所職聽以本官就第歲餘轉吏部侍郎隨承周制官無清濁彥師在職凡所仕人頗甄別士庶論者美之後復以病出為汾州刺史卒官獻字思弼

魏書曰母張氏字黃龍本宗宮人以賜麗生獻

年十餘襲爵撫軍大將軍平原王沉雅好學折節下士年二十時人便以宰輔許之娶東徐州刺史博陵崔鑒女時孝文尚未改北姓鑒謂所親云平原王才度不惡

但恨其姓名重複獻婚自東徐還經鄴見李彪甚敬悅
之仍與趣京以為館客後為北征都督擊柔然大破之
遷侍中都曹尚書時柔然又犯塞詔獻討之追至石磧
禽其帥赤阿突等數百人還遷尚書左僕射領北部尚
書十六年降五等爵以麗勲著前朝封獻鉅鹿郡公尋
為使持節鎮北大將軍尚書令衛將軍討柔然大破之
而還以母憂解孝文將南伐以本官起授征南將軍獻
固辭請終情禮勅有司敦喻不許復除使持節都督恒

州刺史行尚書令時車駕南征上表諫

魏書載獻表曰蕭鸞竊據江左惡盈罪稔取亂攻昧
誠在茲日但長江浩蕩彼之巨防又南土昏霧鬱蒸
師人經夏必多病疾而鼎遷草創庶事甫邁臺省無論
政之館府寺靡聽治之所且兵徭並舉聖主所難今
介冑之士外攻仇寇羸弱之夫內勤土木運給之費
日損千金驅罷兵討堅城將何以取勝陛下往冬之
舉正欲曜威江漢耳自春幾夏理宜釋甲願索旌捲

旆為持久之方崇成帝居深重本之固修理華區諷
風洛浦布仁化以綏近播恩施以懷遠乘流而下勢
勝萬倍豈必茲年競斯尺寸

帝不從獻又表請車駕還代親臨太師馮熙葬坐削都
督三州諸軍事尋進號征北大將軍以有順遷之表加
邑四百戶時穆秦為定州刺史以疾請恒州自効乃以
獻為定州刺史未發遂與秦等同送賜死獄中聽免孥
戮徙其妻子遼西

魏書載孝文與僕射李冲領軍于烈曰陸獻元丕與卿等俱受非常之話許以不允思保大義豈謂無心一至於斯獻反逆自負違誓在彼不關朕也反逆既異餘犯雖欲矜恕末如之何然猶憶先言聽自死別府免厥孥戮丕二子一弟首為賊端其父理在可觀隱而弗窮以連坐應死特恕為民朕本期有終而被自棄卿等忽及今日違心乖念一何可悲故此別示想無致怪也謀反之外皎如白日耳冲烈皆上表謝

獻長子希道字洪度有風貌美鬚髯歷覽經史頗有文
致初拜中散遷直郎坐父事徙遼西後得還從征自効
効以軍功賜爵淮陽男累遷前將軍郢州刺史希道善
馭邊甚有威略轉平西將軍涇州刺史卒官贈撫軍將
軍定州刺史希道長子士懋天平中以其曾祖麗有翼
戴之勲詔特復鉅鹿郡公令士懋襲位營州刺史

魏書曰希悅弟希質累官建州刺史爾朱榮死世隆
率衆北還晉陽希質固守拒之城陷以妻元氏係榮

妻兄孫獲免孝靜時官至都官尚書卒謚曰文

麗季弟騏驎騏驎孫操字仲志高簡有風格早以學業知名雅好文操仕魏兼散騎常侍聘梁使還為廷尉卿齊文襄為世子甚好色崔季舒為掌媒焉

愚按季舒鮮恥如此猶使以毆君逆臣冒忠諫名可乎

薛氏寘書妻元氏有色迎入欲通之元氏正辭且哭世子季季舒逆付廷尉罪之操曰廷尉守天子法須知罪

狀世子怒召操命刀環築之更令科罪操終不撓乃口責之後徙御史中丞天保中卒於殿中尚書高貴弟孟遠孟遠孫爽字開明少聰敏年九歲就學日誦二千餘言齊尚書僕射楊愔見而異之曰陸氏世有人仕齊位中書侍郎齊滅周武帝聞其名與陽休之袁叔德等俱徵入關諸人多將輜重爽獨載數千卷書至長安授宣納上士隋文帝受禪頻遷太子洗馬與左庶子宇文愷等撰東宮典記七十卷朝廷以其博學有口辯陳人至

金史卷一百一十二
卷一百一十二
境常令迎勞卒官贈上儀同宣州刺史子法言敏學有
家風釋褐承奉郎初奕之為洗馬常奏文帝云皇太子
諸未有嘉名請依春秋義更立名字帝從之及太子廢
帝追怒奕曰我孫製名寧不自解陸奕乃爾多事扇惑
於勇亦由此人其身雖故子孫並宜屏黜不齒法言竟
坐除名

源賀西平樂都人私署河西王禿髮儁種子儁種為乞
伏熾盤所滅賀自樂都奔魏賀偉容貌善風儀太武素

聞其名及見器其機辯賜爵西平侯謂曰卿與朕同源
因事分姓今可為氏

愚按道武改拔氏為長孫太武改禿髮氏為源皆孝
孝文改虜姓為華姓之見端

從擊叛胡白龍又討吐京胡皆先登陷陣以功進號西
平將軍賀征涼州以為嚮道問攻戰計賀曰姑臧城外
有四部鮮卑各為之援然皆臣祖父舊人臣願軍前宣
國威信必相率請降外援既服攻其孤城拔之如反掌

耳帝曰善乃遣賀招慰下三萬餘落及圍姑臧因無外慮故得專力攻之涼州平常以功進爵西平公又從征柔然擊五城北京胡討蓋吳諸賊皆有功拜散騎常侍從駕臨江為前鋒大將善撫士卒加有料敵制勝之謀賀為人雄果每遇強寇輒自奮擊帝深誠之賀本名破羌是役也帝謂曰立名宜保其實何可濫也賜名賀拜中尚書南安王余為宗愛所殺賀部勒禁兵靜遏外內與南部尚書陸麗決議定策翼戴文成令麗與劉尼馳

詣苑中奉迎賀守禁中為內應俄麗抱文成單騎至賀
乃啟門及即位以定策勲進爵西平王及班賜百僚勅
賀任意取之辭以江南未賓漠北不款府庫不宜致匱
固使取之唯取之馬一疋時斷獄多濫賀上書曰按律
謀反之家子孫雖養他族追還就戮欣以絕罪人之類
彰大逆之辜其為刼賊應誅者兄弟子侄在遠道隔關
津皆不坐竊惟先朝制律之意以不同謀非絕類之罪
故特垂不死之詔若年十三已下家人首惡計所不及

可原其命沒入官帝納之出為冀州刺史改封隴西王
既受除上書曰臣聞人之所寶莫寶於生全德之厚者
莫厚於宥死然犯死之罪難以盡恕權其輕重有可矜
恤今勅寇游魂於北狡賊負嶮於南其在疆場猶須戍
防自今非大逆赤手殺人之罪其坐贓及盜與過誤之
愆應入死罪者皆原命謫守邊境是則已斷之體更可
受生成之恩徭役之家漸蒙休息之惠刑措之化庶幾
在茲帝嘉納之已後入死者皆恕死徙邊久之帝謂郡

臣曰昔源賀勸朕宥諸死刑徒充藩諸戍自爾至今今
一歲所活殊為不少濟命之理既多邊戍之兵有益苟
人人如賀朕何憂哉賀臨州詢獄以情徭役簡省清約
寬裕甚得人心時武邑郡姦人石華吾沙門道可與賀
謀反有司以聞文成曰賀保無此乃精加訊檢華果引
証乃遣使慰勉之顧左右曰以賀忠誠尚致誣謗不若
是者可無慎乎時孝殿最賀政為上第賜衣馬器物班
宣天下後徵拜太尉柔然寇邊賀從駕討破之獻文將

傳位京兆王子推時賀都督諸軍事屯漠南乃馳傳徵
賀賀至正色固執不可即詔持節奉皇帝璽綬授孝文
是歲河西叛勅遣賀討之多所降破賀依古今兵法及
先儒耆舊說略採至要為十二陳圖上之獻文覽而嘉
焉又都督三道諸軍屯漠南時每歲秋冬遣軍三道並
出以備北寇至春中乃班歸賀以勞役京都又非禦邊
長計乃上言請募諸州鎮有武勇者三萬人復其徭賦
厚加賑恤分為三部二鎮之間築城城置萬人給強弩

十二牀武衛三百乘弩一牀給年六頭武衛一乘給牛
二頭多造馬槍及諸器械使武略大將二人鎮撫之冬
講武春種植並戍並耕則兵未勞而有盈蓄矣又於白
道南三處立倉運近州鎮租粟充之足食足兵以脩不
虞於事為便不可歲常舉衆事寢不報上書稱病乞骸
再三許之朝大有議皆就詢訪又給衣藥珍羞太和元
年二月療疾於溫湯孝文明太后遣使屢問消息太
醫視疾患篤還京師乃遣令諸子曰吾頃以老患辭事

不悟天慈降恩爵逮于汝汝其母傲恠母荒怠母奢越
母嫉妬疑思問言思審行思恭服思度過惡揚善親賢
遠佞目觀必真耳屬必正忠勤事君清約臨已吾終後
所葬時服卑櫛足申孝心芻靈明器一無用也三年卒
贈侍中太尉隴西王印綬謚曰宣賜輜輶車及命服溫
明祕器陪葬金陵長子延性謹厚少好學賜爵廣武子
卒贈侯謚曰簡延弟思禮後賜名懷謙恭寬雅有大度
文成末為侍御史散父賀辭老詔授父爵後持節督諸

軍屯於漠南柔然甚憚之還除殿中尚書出為長安鎮
將雍州刺史清儉有惠政善撫恤劫盜息止後拜殿中
尚書加侍中參都曹事又都諸軍以征柔然六道大將
咸受節度還尚書令參議律令後例降為公除司州刺
史又從駕南征加衛大將軍領中軍事以母憂去職駕
幸代詔使者弔慰宣武景明二年除尚書左僕射加位
特進時詔以姦吏犯罪每多逃遁肆肯乃出並皆釋然
自今犯罪不問輕重藏竄者悉皆遠流若永避不出兄

弟代徙懷乃奏曰謹按條制逃吏不在赦限竊惟聖朝之恩事異前宥諸流徙在路尚蒙旋返況有未發而仍遣邊戍案守宰犯罪逃亡者衆祿潤既優尚有茲失及蒙恩宥卒然得還今獨苦此等恐非均一法書奏門下以成式既班駁奏不許懷重奏曰臣以為法貴經通政尚簡要刑憲之設所以網羅罪人苟理之所備不在繁典伏尋條制勲品以下罪發逃亡遇恩不赦仍流妻子雖欲抑絕姦途匪為通式謹按事條侵官敗法專據流

外豈九品已上人皆貞白也其諸州守宰職任清流至
有貪濁事發逃竄而遇恩免罪勲品以下獨乖斯例如
此則寬從上流法切下吏育物有差惠罰不等又謀逆
滔天經恩尚免吏犯微罪獨不蒙赦使大宥之經不通
開生之路致墜進違古典退乖今律輒率愚見以為宜
停任奏宣武納之其年除車騎大將軍涼州大中正

魏書載懷表曰蕭寶卷肆厥淫昏月滋日甚內外離
心其雍州刺史蕭衍勒兵東襲上流之衆已逼其郊

廣陵京口鍾離淮陰皆觀望得失秣陵孤危制不出
門斯實天啟之期乘厥蕭牆之釁籍其分崩之隙東
據歷陽兼指瓜步緣江鎮戍達于荆郢則江西吳會
指期可舉若蕭衍克就上下同心非直後圖為難實
亦揚境圍逼何則壽春去建鄴七百里而已山川水陸
彼所諳利脫江湘無波君臣效職藉水憑舟倏忽而
至壽春容不自保江南將若之何今寶卷邑居有土
崩之形邊域無繼援之志清蕩江區實在今日後以

衍事克遂傳

懷又表曰昔太武皇帝升遐南安在位出拜東廟為賊臣宗愛所賊時文成皇帝龍潛內苑宗愛異圖神位未立先臣賀與長孫渴侯陸麗等奉迎文成纂徽寶命麗以扶負聖躬親所見識蒙授撫軍司徒公平原王興安二年追論定策勲進先臣爵西平王皇興季年獻文皇帝將傳位京兆王先臣時屯武川被徵詣京特見顧聞先臣固執不可久乃許之遂命先臣持節授璽綬于孝

文皇帝至太和十六年麗息獻狀秘書稱其亡父與先臣援立文成朝廷追錄封獻鉅鹿郡開國男臣時伏草土不容及例至二十年除臣雍州刺史臨發奉辭面奏先帝申先臣舊勲時蒙勅旨但赴所臨尋當別判至二十一年駕幸雍臣復陳聞時蒙勅旨征還當授自宮車晏駕遂爾不申竊惟先臣遠則援立文成寶厯不墜近則陳力獻文神器有歸麗以父功獲山河之賞臣有家勲不霑茆土之錫得否相懸請垂裁處詔授北馮翊郡

開國公食邑九百戶又詔為使持節加侍中行臺巡行
北邊六鎮恒燕朔三州賑給貧乏兼採風謠考論殿最
事之得失先決後聞自京師遷洛邊朔遙遠加以連年
旱儉百姓困弊懷銜命撫導存恤有方便宜轉運有無
通濟時后父子勁勢傾朝野勁兄子祚與懷宿通婚時
為沃野鎮將頗有受納將入鎮祚迎郊道左懷不與相
聞即劾祚免官懷朔鎮將元尼須與懷少舊亦貪穢狼
籍置酒請懷曰命之長短由卿之口懷曰今日之集乃

懷與故人飲酒之坐非詢獄之所明日公庭始為使人
檢鎮將罪狀之處尼湏揮淚而已既而懷表劾尼湏其
奉公不撓皆此類

魏書曰懷以北蕃連年災旱惟有水田少可蓄畝請
依地令給細民先貧後富無令主將叅僚專擅腴美
又言邊圉事虧實少畿服請主帥史佐五分減三詔
從之

時百姓為豪強侵壓積年枉滯一朝見申屠日有百數

所上事宜便于北邊者凡三十餘條皆見嘉納正始元年九月有告柔然率十二萬騎六道並進欲直趣沃野懷朔南寇恒代詔懷以本官任使持節侍中出據北蕃指授規略隨須徵發諸所處分皆便宜從事又詔懷子直寢徵隨懷北行詔賜馬一匹細鎧一具御稍一枚懷拜受既訖乃于其庭跨鞍執稍躍馬大呼顧謂賓客曰氣力雖衰尚得如此蠕蠕雖畏壯輕老我亦未便可欺今奉廟勝之規總驍捍之衆足以擒其首帥獻俘闕下

耳時年六十一懷至雲中柔然亡遁旋至悼代乃按視
諸鎮左右要害之地可以築城置戍處皆量其高下揣
其厚薄及糧積仗之宜大牙相救之勢凡表五十八條
宣武並從之

魏書載懷表曰蠕蠕不羈遊魂烏集水草為家歷代
驅逐莫之能制皇魏平城威震天下今定鼎成周去
去北遙遠戎馬甲兵十分闕八庶事蕩盡謂宜準舊
鎮東西相望令形勢相接築城置戍分兵要害勸農

積粟一旦警急隨便翦討且北方沙漠夏乏水草時
有小泉不濟大衆脫有非意要待秋冬因雲而動若
至冬日冰沙凝厲游騎之寇不敢攻城亦不敢越城
南出如此則北方無憂矣宣武從之今北鎮諸戎東
西九城是也

卒贈司徒公謚曰惠

冊府元龜曰太常寺議懷體尚寬柔器操平正宜依
謚法柔直考終曰靖司徒府議懷作牧陝西民欽惠

化入總端二朝列歸仁宜依謚法布德執義曰穆詔
曰府寺所執並不克允愛民好與曰惠可謚惠公
懷性寬簡不好煩碎恒語人曰為政貴舉大綱而已如
為屋但外望高顯楹棟平直足矣斧斤不平非屋病也
性不飲酒而喜以飲人好接賓客雅善音律雖在白首
宴居之暇常自操絲竹子子邕字靈和少好文雅篤志
于學推誠待士士多歸之累遷夏州刺史時沃野鎮人
破六韓拔陵首叛統萬逆徒與相應接子邕嬰城自守

城中糧盡煮馬皮食之子邕善綬撫無有離貳以饑饉
轉切欲自出求糧留子延伯據守

魏書曰延伯初為司空參軍事適南秦民吳富反詔
以河間王琛為都督而延伯亦隨叔子恭西討戰必
先鋒子恭見其年幼常呵制之不能禁也子雍在夏
州表乞兵援詔迎伯帥羽林千人赴之城鬪戰野勇
冠三軍子雍向東夏留延伯城守延伯與軍士共分
湯菜防固城隍及子雍為胡執延伯乃人人曉諭曰

吾父凶吉不惻方寸焦亂實難裁割但奉命守城若以私害公則誠孝並闕諸君幸得此心無虧所寄於是衆感其義莫不勵奮朝廷嘉之除龍驤將軍行夏州事封五城縣男還國子卒能固守及後刺史至延伯率領義勇還赴子雍在甌堂橋戰先鋒陷陣身擒維摩及至白冰首推阿非已從子雍至都進爵浮陽伯後假冠軍將軍別將隨子雍北征與葛榮戰沒時年二十四贈持節平北將軍涼州刺史愚按延伯忠

義若此北史削其傳云何

寮屬僉云未棄城俱去更展規略子邕泣請于衆不曰
吾世荷國恩此吾死地更欲何求所患乏糧耳遂自率
羸弱向東夏運糧延伯與將士逆出城哭而拜辭三軍
莫不嗚咽子邕為朔方胡帥曹阿各拔所邀力屈被執
乃密遣人齎書間行與城中云大軍在近汝其奉忠勿
移其操子邕雖被囚束雅為胡人所敬常以民禮事之
子邕為陳安危禍福之端勸阿各拔令降將從之未果

死拔弟桑生代總部衆竟隨子邕降時北海王顥為大
行臺子邕具陳諸賊可滅狀顥給予邕兵令其先出時
東夏合境叛所在屯結子邕專戰而前九旬中凡數十
戰乃平東夏徵稅租粟運糧統萬二夏漸寧及蕭寶寅
等為賊所敗關右騷擾時子邕新平黑城遂率士馬并
夏州募義人鼓行南出賊帥康維摩守鋸谷斷紹顥棠
橋子邕與戰大破之擒維摩又攻破賊帥契官斤于楊
氏堡出自西夏至于東夏轉戰千里至是朝廷始得委

問除兼行臺尚書復破賊帥紇單步胡提于曲沃孝明
璽書勞勉之子邕在白水郡破賊率宿勤明達子阿非
軍多所斬獲除給事黃門侍郎封樂平縣公以葛榮久
逼信都詔子邕為北討都督相州刺史安樂王鑒據鄴
反勅子邕與都督李神軌先討平之改封陽平縣公遂
與斐衍發鄴討葛榮而信都城陷除子邕冀州刺史與
斐衍俱進

魏書載子邕表曰賊中甚饑專仰野掠今朝廷足食

兵卒飽暖高壁深壘勿與爭鋒彼求戰不得野掠無
獲不盈數旬可坐制凶醜時斐衍復表求行詔子邕
與俱進子邕重表固請謂苟逼固行取敗旦夕詔不
聽

子邕戰敗而歿贈司空謚莊穆子邕弟子恭字靈順聰
敏好學稍遷尚書北主客郎攝南主客事時梁亡人許
周自云梁給事黃門侍郎朝士咸共信待子恭奏以為
真偽難辯

魏書載子恭奏曰徐州表托化人許圓并其弟周等
究其牒狀自稱蕭衍黃門侍郎又稱心存山水不好
榮宦因爾歸國願畢志嵩嶺若如所言初屈之日即
應杖策尋山負帙沿水而乃廣尋知己遍造執事希
榮之心已見逃宦之志安在昔梁鴻去鄉終傭吳會
逢萌浮海遠客遼東並全志養性逍遙而已考之事
實何其懸哉

請下徐揚二州密訪周果以罪歸闕詐假職位如子恭

所疑河羌却鉄忠反詔子恭為行臺討之子恭嚴之勒
諸軍不得犯民一物輕與賊戰然後示以威恩兩旬間
悉降朝廷嘉之正光元年為行臺左丞巡北邊轉為起
部郎中明堂辟雍並未建就子恭上書求加經綜

魏書曰子恭言今諸寺大作稍以粗舉並可徹減專
事經綜使祖宗有薦配之期蒼生覩禮樂之富

書奏從之稍遷豫州刺史頻以軍功加鎮南將軍兼尚
書行臺北海王顥入洛加子恭車騎將軍子恭不敢拒

而頻遣間使參考莊動靜未幾顥敗駕還洛錄前後征討功封臨潁縣侯侍中及爾朱榮被誅世隆度律斷據河橋詔子恭為都督討之尋太府卿李苗夜焚河橋世隆退走以子恭兼尚書僕射為大行臺大都督

魏書曰爾朱兆率衆南出子恭所部都督史忸龍羊文義開柵降兆子恭退走為所敗兆因入洛子恭竄於緱氏仍被執送俄見釋

節閔初以預定策勲封臨汝縣子孝武時入為吏部尚

書以子恭前在豫州戰功追賞襄城縣男又論餘効封
新城縣子以授其子天平三年拜魏尹卒贈司空公謚
文獻子彪字文宗學涉機警少有名譽魏永安中以功
賜爵臨潁縣伯天平四年為涼州大中正及齊文襄攝
選沙汰臺郎以文宗為尚書祠部郎中皇建二年累遷
涇州刺史文宗以恩信待物甚得邊境之和為隣人欽
服前政被抄掠者多被放遣累遷秦州刺史乘傳之府
特給後部鼓吹

北齊書曰文宗為治如在涇州時

時李貞聘陳陳主去齊朝還遣源涇州來瓜步真可謂
通和矣武平三年授祕書監陳將吳明徹寇淮南歷陽
瓜步相尋失守趙彥深于起居省密訪文宗討捍之計
文宗曰國家待遇淮南失之同于萬箭耳謂宜以淮南
委王琳琳于曇瑱不肯北面事之明矣

北齊書載文宗言曰如文宗計者不過專委王琳淮
南招募三四萬人風俗相通能得死力且琳于曇瑱

金史卷一百一十五
卷一百一十五
必不肯北面事之若不推赤心干琳別遣餘人則掣肘便成速禍

彥深曰此誠良圖但爭來十日已不見從時事如此安可盡言因相顧流涕及齊平與陽休之等十八人入京授儀同大將軍司成下大夫隋開皇中拜莒州刺史遇病去官卒文宗以貴族子弟升朝列才識敏贍以幹局見知然好游貴要門時論以為善附會師字踐言少知名明辯有識悟尤以吏事自許仕齊為尚書左外兵郎

中又攝祠部後屬孟夏以龍見請雩時高阿那肱為錄
尚書事謂為真龍出見大驚喜問龍所在云作何顏色
師整容云此龍星初見依禮當雩祭郊壇非謂真龍別
有所降阿那肱忿作色曰漢兒多事強知星宿祭事不
行師出竊歎曰國家大事在祀與戎禮既廢也其能久
乎齊亡無日矣尋周武平齊授司賦上士隋文受禪累
遷尚書左丞以明幹著稱時蜀王秀頗違法度乃以師
為益州總管司馬俄秀被徵秀恐京師有變將謝病師

數勸之不可違命秀作色曰此我家事何預卿也師垂涕苦諫

隋書載師諫曰比年以來國家多故庶人二十年太子相次淪廢秦孝王寢疾奄至薨殂聖情何以堪今有勅追王又遷延未去內外疑駭若發雷霆之詔降一介之使王何以自明

秀乃從徵秀發後州官屬多相連坐師以此獲免後加儀同三司煬帝即位拜大理少卿帝在顯仁宮勅宮外

衛士不得輒離士守有一主帥私令衛士出外帝付大理師據法奏徒帝令斬之師奏曰若陛下初便殺之自可不關文墨既付有司義歸恒典脫宿衛近侍更有此犯將何以加之帝乃止師居職強明有口辨而無廉平之稱卒于刑部侍郎子恭弟纂以太府少卿遇害河陰纂子雄字世略少寬厚美姿容初仕魏歷位秘書郎秘書隋書曰屬其父為高氏所殺雄脫身逃變姓名西歸長安周太祖見而器之賜爵隴西公觀此則上文所

云篡遇害河陰誤宜正之

在周以伐齊功封朔方公歷檢校徐州總管及尉遲迴起兵時雄家累在湘州迴潛以書誘之雄卒不顧隋文帝遺書慰勉之迴遣其將畢義緒據蘭陵席毘陷昌慮下邑雄遣衆悉平之陳人見中原多故遣其將蕭摩訶任蠻奴等侵江北自江陵東距壽陽民多應之攻陷城鎮雄與吳州總管于顗等擊走之悉復故地進位上大將軍拜徐州總管遷朔州總管

隋書曰突厥來寇掠雄輒捕擊之深為北虜所憚

平陳之役從秦王俊出信州道陳平以功進位上柱國
賜子崇爵端氏縣伯褒為安化縣伯復鎮朔方後歲上
表乞骸徵還京師卒于家子嵩嗣大業中為尚書虞部
郎討北海賊力戰死之贈正議大夫

劉尼代人父婁為冠軍將軍尼勇果善射太武見而喜
之拜羽林中郎賜爵昌國子宗愛既殺南安王余於東
廟祕之唯尼知狀尼勸愛立文成愛自以負罪景穆驚

曰君大癡人皇孫若立豈忘正平時事乎尼曰若爾立誰愛曰待還宮擇諸王子賢者立之尼懼其有變密以狀告殿中尚書源賀時與尼俱典兵宿衛仍共南部尚書陸麗謀密奉皇孫

魏書載尼賀與麗謀曰宗愛立南安復殺之今不奉戴皇孫以從民望社稷危矣麗從之

於是賀與尚書長孫渴侯麗兵守衛尼與麗迎文成苑中麗抱文成于馬上入京城尼馳還東廟大呼曰宗愛

殺南安王大逆不道皇孫已登大位有詔宿衛之士皆
可還宮衆咸喝萬歲賀及渴侯即執宗愛賈周等勒兵
入奉文成于宮門外入登永安殿以尼為內行長封東
安公尋遷尚書右僕射為定州刺史在州清慎文成末
為司徒獻文即位以尼有大功先朝特加尊重賜別戶
四十皇興四年駕北征帝親誓衆而尼昏醉兵陣不整
帝以其功重特恕之免官而已延興四年卒子社生襲
薛提太原人皇始中累遷晉王丕衛兵將軍冀州刺史

封太原公有政績徵拜侍中攝都曹事太武崩祕不發
喪尚書左僕射蘭延侍中和延等議以皇孫幼冲宜立
長君徵秦王翰置之祕室提曰皇孫世嫡民望所係眷
秋雖少令問聞于天下廢所宜立而更別求君必不可
延等未決中常侍宗愛知其謀矯皇后令徵提等入殺
之文武即位以提有謀立之誠詔提弟浮子襲先爵太
原公有司奏降為侯

論曰陸侯以智識見稱馥乃不替風範雅仗名節自立

功名其傳芳銘典宣徒然也麗忠國奉主鬱為棟梁資
忠履義赴難如歸世載克昌名不虛得獻秀以沉雅顯
達何末亦披猖子彰令終之美家聲孔振印及彥師俱
以孝為本出處之譽並可作範人倫爽學業有聞亦人
譽也源賀堂堂非徒武節觀其翼佐文成廷抑禪讓殆
社稷之臣懷幹略兼舉出內馳譽繼迹賢孝不墮先業
子邕功立夏方身亡冀野彪著名齊朝師雄官成隋代
美矣劉尼忠國宣徒驍猛之用薛提正議忠謀見害姦

閱痛乎

南北史合注卷一百十五